

segmentis duobus basalibus vitta longitudinali antice abbreviata ex pube adpressa argentea notatis. Caput et thorax vermiculato-striata, illud longitrosum, hic in pronoto striis arcuatis, in mesonoto longitudinalibus, gaster opaca, subtiliter et regulariter secundum longitudinem striata. Caput subtrapezoideum, angulis posticis rotundatis, laminis frontalibus distantibus, modice elevatis, mandibulis striatis. Thorax sutura meso-epinotali obsoleta, pronoto acute marginato, angulis anticis acutis et productis, marginibus pronoti et mesonoti incisura separatis, epinoto spinis robustis, depresso, acutis, ante spinam lobulo marginis utrinque brevi. Petioli squama haud crassa, spinis longioribus et subtilioribus quam epinoti, gasteris basin amplectentibus, margine supero inter spinas acute angulatim producto. — L. 5 mm.

Præcedenti affinis, sed multo robustior, marginibus thoracis minus altis, et loco laciniae epinoti saltem lobo minuto. Præsertim vitta gasteris longitudinali argentea notabilis.

**93. Polyrhachis Heinlethi For. var. papuana n. var.**

*Operaria*. A specimine typico ex *Queensland* differt mesonoto postice angustiore, lateribus sine dentibus, sed margine elevato et sinuato, epinoto ante spinam sine dente, sed lobulo brevi, rotundato.

**94. Polyrhachis croceiventris n. sp.**

*Operaria*. Nitidissima; tota nigra, gastere croceo, antennis pedibusque obscure ferrugineis; disperse pilosa, vix pubescens. Caput oblongum, postice rotundatum, clypeo gibboso, subcarinato, antice lobo late emarginato, laminis frontalibus longis, leviter sigmoidibus, oculis post dimidiem capitis laterum longitudinem. Thorax gracilis, sutura post mesonotum nulla, dorso haud marginato, pronoto antice utrinque spina valida, compressa, acuta, extrorsum et deorsum flexa, epinoti spinis longis, oblique ascendentibus. Petiolus nodiformis, antice superne angulatus, utrinque spinula tenui, acuta. Antennæ et pedes longi, breviter pilosi. — L. 9—10 mm.

*P. nigricipiti* F. SM. (*Atalanta* EMERY) proxima, colore, spinis pronoti deflexis et spinulis petioli agnoscenda. In *P. nigricipile*, spinæ pronoti sunt minus compressæ, petiolus loco spinarum dentibus tantum instructus.

**95. Polyrhachis paromalus F. Sm. (Tab. VIII. fig. 46.)**

*Operaria*. *P. mucronatae* et *Hippomanes* affinis, sed major, magis elongata, squama petioli basi crassiore, magis nodiformi, superne magis attenuata agnoscenda. Caput et thorax subnitida, confertim punctata, punctis majoribus dispersis pubigeris; abdomen nitidius punctis minutioribus minus confertis.

In silva Lemien.

*Observatio*. — Speciem descripsérat F. SMITH ex Insula Ceram. Specimina papuana cum descriptione convenire videntur.